



Broj : 04-05-4-2567/19

Sarajevo, 27. 12. 2019. godine

**SAOPĆENJE ZA JAVNOST O OBJAVLJENOM IZVJEŠTAJU REVIZIJE UČINKA
„PRAĆENJE REALIZACIJE PREPORUKA IZ IZVJEŠTAJA REVIZIJE UČINKA:
NEDOVOLJNA OBNOVA ŠUMA U FEDERACIJI BiH KAO POSLJEDICA NEEFIKASNOG SISTEMA
UPRAVLJANJA ŠUMAMA“**

Ured za reviziju institucija u Federaciji Bosne i Hercegovine proveo je praćenje realizacije preporuka iz Izvještaja revizije učinka „Nedovoljna obnova šuma u Federaciji BiH kao posljedica neefikasnog sistema upravljanja šumama“, koji je objavljen 2014. godine. Cilj praćenja bio je ispitati preduzete aktivnosti nadležnih institucija na osnovu Izvještaja revizije učinka, te procijeniti u kojoj mjeri su date preporuke realizovane.

Ustanovljeno je da su nadležne institucije u proteklom periodu preduzele određene aktivnosti na realizaciji preporuka, ali da **niti jedna od njih još uvijek nije u potpunosti realizovana. Od ukupno 11, devet preporuka je djelimično realizovano, dok su za dvije pokrenute početne aktivnosti na realizaciji.**

Oblast šumarstva na nivou FBiH još uvijek nije zakonski uređena i zahtijeva kvalitetnije angažovanje nadležnih institucija. Iako je Vlada FBiH još u 2017. godini utvrdila i u parlamentarnu proceduru uputila Prijedlog zakona o šumama, utvrđeno je da ga **Parlament FBiH još uvijek nije razmatrao**. Također, postoje i drugi značajni nedostaci, koji se ogledaju u nepostojanju cjelovitog šumarskog programa u FBiH, u nedovoljnim aktivnostima na unapređenju organizacije i upravljanja šumskoprivrednih društava, neadekvatnim mehanizmima nadzora nad korištenjem i obnovom šume, nedovoljnoj transparentnosti podataka o prikupljenim i utrošenim sredstvima od naknada koje se uplaćuju za šume, te u neuspostavljanju jedinstvenog informacionog sistema za oblast šumarstva u FBiH.

Rezultati praćenja pokazali su i da Parlament FBiH, odnosno Parlamentarna komisija odgovorna za reviziju, **nisu uspostavili funkcionalan mehanizam praćenja realizacije preporuka iz Izvještaja revizije učinka** s obzirom na to da još uvijek nije osigurano da institucije dostavljaju povratne informacije o preduzetim aktivnostima na realizaciji preporuka.

Ured za reviziju institucija u Federaciji Bosne i Hercegovine cijeni da se oblasti šumarstva treba posvetiti značajnija pažnja, kako bi se uspostavio efikasan sistem upravljanja i gospodarenja šumama na području cijele FBiH. **Šume imaju ekonomsku, socijalnu i ekološku funkciju, što obavezuje sve nadležne institucije i društvo u cjelini da rade na njihovom očuvanju, zaštiti i racionalno ih koriste.**

Kompletan Izvještaj revizije učinka dostupan je na internet-stranici Ureda za reviziju: www.vrifbih.ba.



GENERALNI REVIZOR

Dževad Nekić, dipl. oec.